


যুগান্তর

চবিতে ছাত্রলীগের দু'গ্রুপের সংঘর্ষে ১০ জন আহত

প্রকাশ : ০১ মার্চ ২০১৯, ০০:০০ | প্রিন্ট সংস্করণ



চবি প্রতিনিধি

চট্টগ্রাম বিশ্ববিদ্যালয় ছাত্রলীগের দুই গ্রুপের সংঘর্ষে ১০ জন আহত হয়েছে। বিশ্ববিদ্যালয় শাখা ছাত্রলীগের সাবেক যুগ্ম সাধারণ সম্পাদক আবু সাইদ ও সাবেক সহসভাপতি রেজাউল হক রুবেলের সমর্থকদের মধ্যে বুধবার রাতে ও বৃহস্পতিবার দুপুরে সংঘর্ষ হয়। ঘটনার সঙ্গে জড়িত ৪ জনকে আটক করেছে পুলিশ। দুটি গ্রুপই শিক্ষা উপমন্ত্রী ও কেন্দ্রীয় আওয়ামী লীগের সাংগঠনিক সম্পাদক মহিবুল হাসান নওফেলের অনুসারী।

বিশ্ববিদ্যালয় সূত্রে জানা যায়, বুধবার সন্ধ্যায় সোহরাওয়ার্দী হলের পাশের একটি দোকানে রুবেল গ্রুপ ও সাইদ গ্রুপের কর্মীদের মধ্যে বাকবিতণ্ডা হয়। একপর্যায়ে রুবেল গ্রুপের নেতা সোয়েবুর রহমান কনক সাইদ গ্রুপের কাঁকনকে মারধর করে। সিনিয়রদের হস্তক্ষেপে সেটি মীমাংসা হলেও রাত সাড়ে দশটার দিকে কনক ও আখলাছ সোহরাওয়ার্দী হলের মোড়ে গেলে সাইদ গ্রুপের কর্মীরা তাদের মারধর করে। এ সময় আখলাছের মোটরসাইকেলে আগুন দেয়া হয়। হামলার খবর ছড়িয়ে পড়লে শহীদ আবদুর রব হল ও শাহ আমানত হল থেকে রুবেল গ্রুপ ও সোহরাওয়ার্দী হল থেকে সাইদ গ্রুপের কর্মীরা দেশীয় অস্ত্রশস্ত্র নিয়ে সংঘর্ষে লিপ্ত হয়। উভয় গ্রুপের মধ্যে কয়েক দফা ধাওয়া-পাল্টাধাওয়া ও সংঘর্ষ চলে। এ সময় তিনজন আহত হয়। পরে বৃহস্পতিবার দুপুরে উভয় গ্রুপের মধ্যে আবার ধাওয়া-পাল্টাধাওয়া হয়। এ সময় সোহরাওয়ার্দী হলের প্রায় ২০টি কক্ষ ভাংচুর করা হয়। এক পর্যায়ে পুলিশ লাঠিচার্জ করে উভয় পক্ষকে সরিয়ে দেয়। এ সময় ৫টি রামদা উদ্ধার করে পুলিশ। সংঘর্ষে ছয়জন আহত হয়।

জানতে চাইলে বিশ্ববিদ্যালয় ছাত্রলীগের সাবেক সহসভাপতি রেজাউল হক রুবেল বলেন, কোনো উসকানি ছাড়াই প্রতিপক্ষের কর্মীরা গত কয়েকদিন ধরে আমাদের কর্মীদের ওপর চড়াও হয়। ফলে তারা সম্মিলিতভাবে তাদের অন্যায়ের বিরুদ্ধে রুখে দাঁড়ায়।

সাবেক যুগ্ম সম্পাদক আবু সাইদ বলেন, রুবেলের কর্মীরা আমাদের ওপর অতর্কিত হামলা করে। আমরা এ ঘটনার সুষ্ঠু বিচার দাবি করছি। না হলে চবি ছাত্রলীগ কঠোর কর্মসূচি দেবে।

হাটহাজারী থানার ওসি বেলাল মোহাম্মদ জাহাঙ্গীর বলেন, সংঘর্ষে জড়িত থাকার অভিযোগে ৪ জনকে আটক করা হয়েছে। বর্তমানে পরিস্থিতি শান্ত রয়েছে।

ভারপ্রাপ্ত সম্পাদক : সাইফুল আলম, প্রকাশক : সালমা ইসলাম

প্রকাশক কর্তৃক ক-২৪৪ প্রগতি সরণি, কুড়িল (বিশ্বরোড), বারিধারা, ঢাকা-১২২৯ থেকে প্রকাশিত এবং যমুনা প্রিন্টিং এন্ড পাবলিশিং লিঃ থেকে মুদ্রিত।

পিএবিএক্স : ৯৮২৪০৫৪-৬১, রিপোর্টিং : ৯৮২৪০৭৩, বিজ্ঞাপন : ৯৮২৪০৬২, ফ্যাক্স : ৯৮২৪০৬৩, সার্কুলেশন : ৯৮২৪০৭২। ফ্যাক্স : ৯৮২৪০৬৬

E-mail: jugantor.mail@gmail.com

© সৰ্বস্বত্ব স্বত্বাধিকাৰ সংৰক্ষিত ২০০০-২০১৯ | এই ওয়েবসাইটেৰ কোনো লেখা, ছবি, অডিও, ভিডিও অনুমতি ছাড়া ব্যবহার বেআইনি।